

Inatsisartut suleriaasianni § 33 naapertorlugu aalajangiiffigisassatut siunnersuut manna matumuuna Naalackersuisunit saqqummiunneqarpoq:

Kalaallit Nunaanni pinerluttulerinermi inatsisip allanngortinneqarnera pillugu siunnersuummut missingiut pillugu Namminersorlutik Oqartussat akuersissuteqarnissaat pillugu inatsisartut aalajangiiffigisassaattut siunnersuut (Illoqarfimmi illuliorfiusimasumi illuinnarsuutinik eqqunngitsumik iginnerup pinerluutinngortinneqarnera, takunnissimasunik illersuinerup annertusinera, inip nakkutilliiffiusup atorneranut piumasaqaatinik iluarsineq il.il.)

(Peqqissutsimut, Isumaginninnermut Inatsisinillu Atuutsitsinnermut Naalackersuisoq)

Tunngavilersuineq

Kalaallit Nunaanni pinerluttulerinermi inatsisip allanngortinneqarnissaanut siunnersuummut missingiut pillugu Inatsisartut aalajangiiffigisassaattut siunnersuut (Illoqarfimmi illuliorfiusimasumi illuinnarsuutinik eqqunngitsumik iginnerup pinerluutinngortinneqarnera, takunnissimasunik illersuinerup annertusinera, inip nakkutilliiffiusup atorneranut piumasaqaatinik iluarsineq il.il.) Naalackersuisut tigusimavaat.

Inatsisinik atuutsitsinnermut suliassaqarfimmi nutarterinnermut inatsisissatut siunnersuut ilaavoq, taamaaliornikkut suliassaqarfik danskit pitsaassusaannut naapertuutilerniassammat.

Inatsisissatut siunnersuummi immikkoortut pingaarnerit tallimaapput.

Kalaallit Nunaanni pinerluttulerinermi inatsimmut illoqarfimmi illuliorfigisimasumi aallaasinik eqqunngitsumik iginnerup pinerluutinngortinneqarnissaa inatsisissatut siunnersuutip siullertut siunertaraa, tamanna sakkortuumik pinerlunnerusoq kiisalu politiit malittarisassaannik unioqquitsineruinnaangitsoq, kingornatigut taamaallaat akiliisinneqarnissamik kinguneqartussa, taamaaliornikkut takutinniarnearluni.

Aamma Kalaallit Nunaanni takunnissimasut unnerluutigineqartumut inatsisitigut illersugaanginnertik pissutigalugu sassarnissartik qunugisarmassuk, takunnissimasunik nalinginnaasumik siorasaarinerit pinerluutinngortinneqarnissaat inatsisissatut siunnersuutip aappaattut siunertarivaa. Inummik, taassuma qanigisaanik, imaluunniit allanik tassunga attuumassuteqartunik, inuup naatsorsuutigineqartumik politiinut imaluunniit eqqartuussivimmuut nassuiaanissaani imaluunniit nassuiaareernerani ajortumik pineqarnissamik siorasaarisoqartillugu aalajangersagaq atorneqartussatut, aalajangiiffigisassatut siunnersuut aqutugalugu Kalaallit Nunaanni pinerluttulerinermi inatsimmi atulersinneqassaaq.

Pingajuattut isertitsivimmut nakkutigineqartussatullu pineqaatissinneqarnissamik eqqartuussisarnernik atuisinnaaneq annertusineqarput, taamaalilluni pineqaatissiissutip eqqortumik pineqarnermik misigititsinissaanik inniminninnerup, matumani innarlerneqartumik inniminninneq ilanngullugu, isertitsivimmut inissiinissaq tunngavilersinnaappagu isertitsivimmut inissiisoqassalluni, unnerluutigineqartulli inuttut atugarisai innimigalugit iperagaanermi nakkutilliinermik aallartitsinissaq aamma imaluunniit innuttaasunut ilaalerseqqinneqarnissaanik pineqaatissiineq tunngavilersinnaappagu nakkutilliinissamik pineqaatissiisoqassalluni.

Sisamaattut inip nakkutilliiffiusup atorneranut piumasaqaatit sakkukillineqarput, pingaartumik isertitsivimmiittoq nipiliorpallaartillugu, aserorteritillugu imaluunniit assigisaanik sakkortuumik pissusilersortillugu akuliunneruallaanngitsumik pineqaatissiinerit naammanneq ajortut takuneqarsinnaammat. Tamatuma kinguneraa isertitsivimmi inimi nakkutilliiffiusumi sivikitsumik inissiineq ileqqorissaarnissaq isumannaatsuunissarlu eqqarsaatigalugit pisinnaasoq. Isertitsivimmi eqqissimatitsinissap isumannaatsuunissallu pingaarutilimmik pisariaqartinneqarnissaat, imaluunniit, isertitsivimmiititap nalinginnaasumik imminnut ajoqusinnginnissaa anguniarlugu, immikkut nakkutigineqarnissaa, isertitsivimmi inip nakkutilliiffiusup siunissami atorneqartarnissaanut piumasaqaataavoq.

Kiisalu pinerluttulerinermi inatsimmi kapitali 33-imi tarnikkut nappaatillit katsorsarneqartarnerannut inissinneqartarnerannullu kina akisussaaneersoq pillugu maleruagassat allanngortinneqassapput. Eqqarsartaatsikkut innarluutillit pineqartillugit kikkut aningaasaqarnikkut akisussaasuuneri pillugit erseqqissaasoqarnissaa tamatumunnga tunuliaqutaavoq, tassami ulluinnarni isumaginninnermi oqartussaasut pineqaatissiissutinik naammassinninnermik suliarinnittuusarmata tamatumunnga tunuliaqutaavoq.

Naalackersuisut inatsisissatut siunnersuummut oqaaseqaataat

Kalaallit Nunatsinni inatsisinik atuutsitsinermut suliaasaqarfiup qajannaatsuullunilu ingerlalluarnissaa pingaaruteqarluinnarpoq. Taamaammat aalajangiiffigisassatut siunnersuut manna inatsisinik atuutsitsinermi suliaasaqarfimmi pitsaassutsip qaffatsikkiartorneranut alloriarnerit ilagaat.

Pisortani aningaasarsiornikkut allaffissornikkullu kingunerisassat

Soqanngilaq. Siunnersuutip akuerineqarneranut atatillugu tarnikkut nappaatillit pillugit eqqartuussinerit naammassineqarnissaasa akilerneqarnissaannut aningaasaliissutit ullumikkut peqqinnissaqarfimmukartinneqartartut eqqarsartaatsimikkut innarluutilinnut atatillugu isumaginninnermut oqartussanut nuunneqartartussanngussapput.

Aningaasaqarnikkut allaffissornikkullu namminersorlutik inuussutissarsiutilinnut kingunerisassat

Soqanngilaq.

Innuttaasunut aningaasaqarnikkut allaffissornikkullu kingunerisassat

Soqanngilaq.

Tusarniaaneq

Justitsministeeriaqarfiup tusarniaaneq isumagaa, tusarniaanermilu kalaallit oqartussaasui attuumassuteqartut peqataatinneqarsimapput. Aalisarnermut, Piniarnermut Nunalerinermullu Naalackersuisoqarfiup missingiut, inatsisissatut siunnersuutip missingiutaatut, januar 2019-

imi kalaallinut soqutiginnittunut ilassutitut tusarniaaviginiarlugit nassiuppaa, tasanilu sakkut pillugit Kalaallit Nunaannut inatsimmut allannguut ilaavoq.

Tusarniaanermut akissutit pillugit tamakkiisumik takussutissiaq oqaaseqaasersugaq suliarineqareerpoq.